

# JOSOE

---

## Tasorintsi iniakerira Josoe

**1** <sup>1</sup>Impogini ikamakera Moiseshi iromperane Tasorintsi, yogari Tasorintsi iniakeri Josoe itomi Non. Irirori inti mutakovagevetaririra Moiseshi. Impo ikantiri:

<sup>2</sup>“Maikari mataka kamake nomperane Moiseshi. Maikari viro piatakera pimonteanakerora Jororan pintentaiganakerira maganiro iseraereegi piaigakera pashintaigakemparora kipatsi nompaiigakempirira pintimantaigakemparira. <sup>5</sup>...Nonkantakanityo nontentakempi nonkañotagakempityo Moiseshi nokantakanira notentari. Garatyo nokumatimpi paniro. <sup>6</sup>Maika arisanora pishintsitashita-kerora magatiro pisuraritakera.”...

## Josoe itigankakera inegiteaigakiterora Jeriko

**2** <sup>1</sup>Impogini yogari Josoe itigankake piteni surari iriaigakera inegiteaigakiterora Jeriko ontiri aikiro kipatsi choenitakotakarorira ikantaigavakeri: “Tsikyanira ineaigimpikari, maireni piaigake pineageigakera magatiro.”

Impo iriroegi iaigake, onti iatimoi-gake pogereiririra surari paitacharira Iraava ario inaigake kara. <sup>2</sup>Kantankicha ikamantunkani igoveenkariegite timaigatsirira Jerikoku ikantunkani:

—Pokaigake iseraere ineageigutera.

<sup>3</sup>Irirori itigankake inkantaigakerora Iraava:

—¿Tyani maika pokaigankitsirira pivankoku?, ontitari ipokashiigake ineageiguterora kipatsi.

<sup>4</sup>Kantankicha irorori tera ontsavetan-teri onti okantaigavakeri:

—Arioniroro ipokaigakeri aka, kantankicha tera nogotenika naro tyara iponiaigaka. <sup>5</sup>Impo ochapinienkatanaira panikyara ashitanaempa osotsimorote otantatsaitakotara avankoegi akya itsataigai. Tera nogote tyarika iaigake. Maika atsi piaige pimpatimaiganakerira pogiaigavakerityo.

<sup>6</sup>Kantankicha irorori onti omanaigakeri enoku otishitapanokoku ovanko otiakotantaigakari irino orogakerira kara. <sup>7</sup>Impo yogari kogaigakeririra akyatyotsataigake impatimaiganakerira. Ikenaignake avotsiku atacharira Jororanku yogonkevageiguta omontea-pinitaganira. Iroro iaiganakera ogenane-kyatyotsaitaagani sotsimoro. <sup>8</sup>Impogini tekyara irimagaige yogaegi omanaigakerira Iraava, irorori oatake atagutanakera enoku inaigakera okantaigiri:

<sup>9</sup>—Naro nogotasanotake impaigakem-piro Tasorintsi oka nogipatsiegite, notsarogavageiganaketyo kara nopinkai-ganakempira. Ario ikañoiigaka aikiro maganiro timaigatsirira aka Kanaanku itsarogavageiganaketyo kara, <sup>10</sup>nokemakoigakeritari Tasorintsi yoviriakaigakempirora Kiraamonkiari Inkaare kameti pikenaignara piponiaigaara Ejipitoku, aikiro nokemakoigakempi pipogereaigna-

kerira amoreogi timaigavetankicharira anta intati Jororanku impo pogaigakeri igoveenkariegite irirori paitacharira Seon intiri irapitene paitacharira Ogo. <sup>11</sup>Antari nokemakoigakempira notsarogavageiganaketyo kara, teratyo intimumatae paniro shintsitaatsinerira. Yogari Tasorintsi pikematsaigirira viroegi intitari shintagitearorira magatiro.

<sup>12-13</sup>“Maika pineaigakenatari notsarogakagaigakempira viroegi nokogake pinkañotagaigakenara naroegi aikiro pintsarogakagaigakenara ganiri nokamaigi. Antari pimpokaigakera pagaveaigakerira notovaire pimpogereaigakerira atsi gara pimaigana naro aikiro. Ario inkañotake apa gara pimaigiri irirori ontiri ina, novirentoegite, ichaegi intiegiri aikiro maganiro noitaneei. Maika nokogake pinkantagantsiigakenara arisanorika pintsatagaigakero nokantaigakempirira maika, ineiaigakempitari Tasorintsi pikematsaigirira viroegi. ¿Tyara nonkanta-kempa nogotakera arisano pintsatagaigakero nokantaigakempirira maika?”

<sup>14</sup>Iriroegi ikantaigiro:

—Nonkañogakeniroro. Garika pitsavetantaigana nontsatagaigakerotyo pikantaigakenarira maika. Antari impaigakenarora Tasorintsi pigipatsiegite garatyo nogaigimpi viroegi. Antari garika nontsatagaigiro narogityo punaiganankichane nonkamaigakera.

<sup>15</sup>Ogari Iraava onti otimake ovanko enoku tantarintsiku otantatsaitakotantarira Jeriko nerotyo ovarintsashaigairira iviritsi ovenakitakara ovanko enoku yagujiganaira aikyara ishigaiganaara.

<sup>16</sup>Irorori okantaigavakeri:

—Piaige otishipageku ganiri itonkivoaigimpi patimaiganakempirira. Pinaigake anta mavati kutagiteri kigonkero impigaigaera iriroegi, impo kametitake piaigaera.

<sup>17</sup>Iriroegi ikantaiganakero:

—Naroegi nontsatagaigakerotyo nokantaigakempirira maika, <sup>18</sup>kantankicha antari nompokaigakera nompogereaigakerira pitovaire pintsatakero oka kiraatsari ovenakitakara pivanko nokenantaiganakarira maika. Impo pampatoitaigakerira aka pivankoku maganiro piitaneegi, piri, piniro, pivirentoegite, piaririegite, maganiro iitaneei piri. <sup>19</sup>Tyanirika kontetankitsine sotsi pivankoku irogakenkanityo, tsikyatatyo inkañotagantakempa. Garatyo naroegi kañotagantaigiri, kantankicha nokantasa-noigakempityo gara tyani yogumatagani nankitsinerira tsompogi pivankoku. <sup>20</sup>Kantankicha pintsavetantaigakenarika naroegi tyampa nonkantaige, tsikyatatyo pinkañotagantaigakempa.

<sup>21</sup>Irorori okanti:

—Irovento maika ario onkañotakempa.

Impo oniaigavairi iaiganai. Impo agakero oga kiraatsari otsatakerora ovenakitakara. <sup>22</sup>Iriroegi iaigake otishiku. Ario inaigake kara mavati kutagiteri kigonkero ipigaigaara patimaiganakeririra. Iriroegi ikogaigavetanakari avotsiku itsotenkavageiganakeri mameri. <sup>23</sup>Impogini iriroegi iaigai yongankeigaa inakera Josoe ikamantageigapaakeri magatiro, <sup>24</sup>aikiro ikantaigiri: “Yogari Tasorintsi mataka ipaigakairo magatiro Kanaan. Yogaegiri timaigatsirira anta itsarogavageiganaketyo kara ipinkasanoiganakaira.”

### Imonteaignanakarora Jororan

**3** <sup>1</sup>Impogini okutagitetanakera yogari Josoe itinaamanaka itentaiganakarira maganiro iseraereegi iponiaiganakarira Sutilemeu iaiganakera otsapiaku Jororan imagaigakera kara <sup>2</sup>mavati kutagiteri. Impo yogaegiri inampinaegi Josoe iaigake ikamosogeigakerira maganiro <sup>3</sup>ikantaigakerira: “Maikari maika pineaigavakerira saseroroteegi

iriaiganakera iramaiganakerora kajonaki onantagetarira pitetiro mapu itsirinkanta-getakarira Tasorintsi piaiganakera viroegi aikiro pogiatakoiganakerora “kameti pogoigakeniri tyara pinkenaiganake, teranika pineimaigeronika avotsi.” ...

<sup>9</sup>Impo yogari Josoe ikantaigiri maganiro: “Atsi pampatoitaigakempara maganiro nonkamantaigakempira tyara ikanti Tasorintsi pikematsaigirira. <sup>10</sup>Maikari maika pogotasanoigake arisano inimoigakempi Tasorintsi kantakanirira itimi, aikiro pogoigake iriro ivaiganakem-pine ironeagaigakemparira kananeoegi, ititaegi, jeveoegi, pereseoegi, jerejeseoegi, amoreoegi intiegiri jevoseoegi kameti viroeginiri pugaigakerine. <sup>11</sup>Maikari maika oivatakotanake igajonakite Tasorintsi shintagitearorira magatiro oivaiganakempira pimonteagakerora Jororan. <sup>13</sup>Antari iragatikajaigapaerora saseroroteegi maiganakerorira oga onkenake ompatuaatanake nigankia ampatoatanakempa katonko ompiriatanaka kamatikya.”

<sup>14</sup>Impo ario okañotaka. Iaiganake maganiro imonteagakarora Jororan iketyo ivaiganankitsi saseroroteegi yamaiganakerora kajonaki. <sup>15</sup>Ogari Jororan omaraarikatyoka kara ontitari kimoariniku, kantankicha iroro yagatika-jai gapairora saseroroteegi <sup>16</sup>oga okenake apatoatanaka katonko ... opiriatanakera kamatikya ovashi ikenaiganake maganiro iaiganakerora oatara Jerikoku. <sup>17</sup>Yogari saseroroteegi ikantakani yarantinkakagaigakero kajonaki kara Jororanku niganki opiriatakera yogiaigakerira iravisaiganakera maganiro.

**5** <sup>1</sup>Impo yogaegiri koveenkaripage amoreoegi timaigankitsirira kara intati Jororanku ikemakoigakeri iseraereegi yoviriakaigakerira Tasorintsi Jororan ikenaigakera imonteagakara. Irireroegi ariompattyoka itsarogasanovageiga-

nakeri kara ipinkasanoiganakerira iseraereegi tenigetyo ishintsitashiigaeri. Ario ikañoigake aikiro koveenkaripage kananeoegi timaigankitsirira ochoenitakara omaraani nia itsarogavageiganaketyo iriroegi aikiro.

*Impogini yogaegi iseraereegi imagai-gapaake kara ochoenitakera Jeriko. Ario yogaegipapaaka pankirintsipage timagetankitsirira kara ovashi tenigera irogivarigaigakeri Tasorintsi manaa, impo tera oneimataenkani ovashi opeganaa kigonkero maika.*

#### **Josoe ineakerira itinkami isoraroegite Tasorintsi**

<sup>13</sup>Impogini inakera Josoe ochoenitakara Jeriko ishonkanaka ineiri paniro surari aratinkake yapagotake isavurite. Impo irirori yañonitanakari ikantiri: —¿Tyanityoka viro? ¿Naroegi pipokashiigake pimpugamentaigakenara intirika pimpugamentaigake nokisaigakerira?

<sup>14</sup>Irirori ikanti:

—Nanti itinkamiegi isoraroegite Tasorintsi.

Yogari Josoe yompatakaventanakari ikantiri:

—Notinkami, ¿tatoita pikogake novetsikakera?

<sup>15</sup>Irirori ikantiri:

—Sapatoreempa, añaonataro naro aka. Irirori isapatoreanaka.

#### **Ipogereaigakerira Jerikokunirira**

**6** <sup>1</sup>Impogini yogaegiri timaigatsirira Jerikoku yashiigakero osotsimorote otantatsaitakotara ivankoegi, ipinkaiganakeritari iseraereegi, ovashi kantakani ashitakara teratyo tyani atumatatsine parikoti, aikiro teratyo tyani gaveatsine inkiakera. <sup>2</sup>Kantankicha yogari Tasorintsi ikantiri Josoe: “Mataka nagaveaigakeri igoveenkariegite Jerikokunirira intiegiri

aikiro maganiro isoraroegite. Maikari maika patiro pogaigakeri pagaveaigakerira. <sup>3-4</sup>Pinkantaigakerira maganiro surariegi manataigankichanerira iriaigakera inkenaiganakera otantatsaita-kotakara Jeriko ironkuaigutemparora impo impigaigae. Iriaigake aikiro 7 saseroroteegi iramaiganakera paniropage tivorintsi itsei ovisha intivoiganakera, impo irirokya giaiganakerine saseroroteegi maiganakeronerira nogajonakite. Ario inkañoigakero maika omirinka ovashi aganakempa 6 kutagiteri. Antari aganakempara kutagiteri 7 impigapigai-gakempara ironkuaigakemparora onkaratake 7. <sup>5</sup>Impogini inkemaigakera maganiro iseraeeregi intivoiganakera tiiiiiitiiiii gatata opega inkaemavaitaiganaketyo maganiro eee eee ee ogatyo onkenake ontuagetanake otantatsaitakotantarira kameti iriatashiigakerira Jerikokunirira impogereaiigakerira.”

*Impo irirori ikamantaigakeri  
maganiro ikantakeririra Tasorintsi.*

<sup>8-9</sup>Impo iatake itentaiganakarira yogaegi manataigankichanerira imirinkaegityo pagoigavagetake isavurite. Itentaiganakari aikiro 7 saseroroteegi maiganankitsirira tivorintsi itivoiganakera. Impo irirokya giaiganakeri saseroroteegi maiganakerorira igajonakite Tasorintsi. Irirokya impogita-sanoiganankitsi pashini manataigankichanerira. Iaigake maganiro yonkuaigutarora Jeriko. <sup>14</sup>Impo okutagiteta-manakera imaigaatiro aikiro. Ario inkañoigakero maika omirinka kutagiteri kigonkero aganakara 6 kutagiteri.

<sup>15</sup>Impogini aganakara kutagiteri 7 tsitekyamanisano iaigamanai imaigairora aikiro yonkuaigaarora, kantankicha maika onti ipigapigaigakaro okaratake 7. <sup>16</sup>Impo antari itivoigakera saseroroteegi

tiiiiiitiiiii ishintiigakerora tera aiñokya ompegempa yogari Josoe ikantaigiri maganiro: “iMaikari maika nani kaemai-ganake!, matakatarir yagaveakagaigakempi Tasorintsi pimpogereaiigakerira maganiro Jerikokunirira, <sup>17</sup>kantankicha pimpogereasanoigakerira maganiro garatyo pitsarogakagumaigari. Intagantyo pogavisaakoigake Iraava intiegiri aikiro naigankitsirira ovankoku, ariokuniri omanaigakerira notigankaigakerira. Magatirosanotyo pimpotakogeigakero nagetankitsirira kara. <sup>18</sup>Garatyo tatoita pitsagatumaigi ganiri ikisashiigimpi Tasorintsi viroegi. <sup>19</sup>Intagati pagageigake perata intiri kori ontiri aikiro magatiro yovetsikantagetunkanirira verontse ontiri asuro irashintakemparora Tasorintsi ogakenkanira ivankoku.”

<sup>20</sup>Ovashi ikaemavaitaiganake maganiro eee eee ee ogatyo onkenake otuagetanake otantatsaitakotantarira Jeriko. Iriroegi patiro yogaiganakero iaigakera <sup>21</sup>ipogereaiigakerira maganiro surariegi, tsinaneeegi, ikyenkarira antariiganankitsi intiegiri antarivageiganaatsirira. Imaiganakerityo aikiro ivakaneegi, irovishaeegite intiri iashinoegite. <sup>22</sup>Kantankicha yogari Josoe ikantaigiri piteniro itigankaigakerira okyara ineageigutirora ikanti: “Maika piaige kiaiganake ovankoku Iraava pintentaiganakerora parikoti ontentaiganakemparira maganiro oitaneeegi, ariotari pikantaigakerori.”

<sup>23</sup>Impo iaigake itentaiganakarora irorori intiri iri, iniro, ovirentoegite, iaririegi, maganiro. Onti yogaigakitiro antakona anta okaratakera inaigakera iriroegi iseraeeregi. <sup>24</sup>Impo ipoigakero magatiro pankotsi ontiri aikiro magatiro nagetankitsirira kara. Intagatisano yagageigake perata intiri kori ontiri aikiro yovetsikantagetunkanirira verontse ontiri asuro kameti irogaigakerora ivankoku Tasorintsi irashintakemparora.

**7** <sup>1</sup>Kantankicha yogari Akan itomi Karimi tera inkeme onti yagagetanake ishineventakarira ovashi ikisaviigakeri Tasorintsi maganiro iseraereegi, teranika intsatagasanoigero ikantaigakeririra. Yogari Karimi inti itomi Saveri itomi Sera iyashikitanakerira Jora.

**Akan ikañotagantaigakerira iseraereegi**

<sup>2</sup>Impogini yogari Josoe itigankaigake inegiteaigakiterora apatotara pankotsi paitacharira Ai ... ochoenitakara Vetaven. Ikantaigavakeri:

—Piaige pinegiteaigakiterora Ai.

Iriroegi iaigake inegiteaigakitiro.

<sup>3</sup>Impo ipokaigaira ikantaigapairi Josoe:

—Maika noneaigakitiri tera intovai-gaige. Garorokari yatsipereai-  
giriagakeri maganiro. Intaganirorokari  
aigankitsine 2,000 ontirika 3,000  
iragaveaigakerityo, teranika intovaigaige.

<sup>4</sup>Impo ario okañotaka intagani aigankitsi 3,000 kantankicha ipugaiganakari Aikunirira yogishigaigakeri <sup>5</sup>yogagaran-taigakeri 36. Impo ipatimaiganakeri kigonkero Sevarimeku, ario imaigavairi aikiro yagaveaigakerira kara anonkakara ovashi itsarogavageiganake maganiro tenigetyo ishintsii-gae. <sup>6</sup>Impo yogari Josoe itisaraamatanakerotyó imanchaki iatake yompatakaventakarira Tasorintsi onakera igajonakite itentaigakarira itinkamiegi iseraere asatyó inakovageiganake anta shavini. Aikiro itiaitaigaka kipatsipane igitoku. <sup>7</sup>Impo ikanti Josoe:

—Notinkami Tasorintsi, gamerakari pogimonteigana nompokaigakera aka. Maika onti pipimantaigakena irogaigakenara amoreoegi impogereai-gakenara. iGamerakarityo nomonteigaro Jororan!

<sup>8</sup>iOjojoo!, yogishigaigamatanatyó kisaigakenarira. Maikari maika tyarikatyó nonkante, <sup>9</sup>inkemakoigakentari kananeoegi intiegiri maganiro timaigatsirira kara irapatoventaigana-

kena ironkuatakoigakenara impogereasa-noigakenara maganiro. Impo onti inkantaiganakempi: 'Tera iragavee Tasorintsi.'

<sup>10</sup>Impo Tasorintsi ikantiri:

—Atsi tinaanakenityo. ¿Antari gara pompatakaseta? <sup>11</sup>Ontitari kantankicha yovetsikaigakera iseraereegi terira onkametite tera intsatagaigero nokantagakeririra. Onti yagaigake nokantakerira gara yagumaigi. Aikiro ikoshiigake impo itsoegaigaka. Maikari maika aityo yomanaigakero iarakiegiku. <sup>12</sup>Nerotyo maika gara yagaveaigai ishintsitashiigairira kisaigakerineririra onti irogishigaigakeri, nokisaviigakeritari yagaigakerira. Maikari garika pokaigiro magatiro terira onkametite ganigetyo notentaigaimpi.

*Impo ikantakeri onkutagitetanakera iripokaigakera maganiro iseraereegi inkantaigakerira tyani kañotankicha ovashi intagakenkanira. Impo okutagitetanakera ipokaigakera ineinkani inti kañotankicha Akan.*

<sup>19</sup>Impo yogari Josoe ikantiri:

—Notomi, atsi pineakagaigakerira maganiro ikoveenkavagetira Tasorintsi pinkamantakenara tatatyó pagake. Gara pomanakotiro.

<sup>20</sup>Irirori ikantiri:

—Arioniroro novetsikake terira onkametite tera nontsatagero ikantakerira Tasorintsi ikematsaigirira iseraereegi, <sup>21</sup>noneakerotari kametimagori manchakintsi ovetsikaganirira Vavironiaku ovashi naganakero. Inti nagake aikiro 200 korikimenta yovetsikantunkanirira perata intiri aikiro pakotinero kori itenatake 600 geramo, nonintavintsakeritari ovashi nagakeri. Maikari aiiño nomanakeri anta nogamisapankoteku nokitatakeri kipatsiku. Yogari perata onti nogasanotakeri savi.

<sup>22</sup>Yogari Josoe itigankake inkogaigakiterira. Iriroegi iaigake ishigavageiganakatyokoigaigakerira. Impo ineaigakeri arioniroro ikitatakeri tsompogi igamisapankoteku, yogari perata yogakeri savi. <sup>23</sup>Impo ikitareakoiganakeri yamaiganakenerira Josoe intiegiri maganiro iseraereegi yogaigakerira ivankoku Tasorintsi. <sup>24</sup>Impo yogari Josoe itentaiganakeri maganiro iseraereegi yagaiganakerira Akan itomi Sera itentagantageiganakerira magatiro yagagetakerira yamaiganakerira otsateniaku paitacharira Akori. Itentagantaiganakeri aikiro itomiegi, irishintoegi, ivakanepage, iashinopagete, irovishapagete, igamisapankote ontiri aikiro magatirosooty yashintagetarira. <sup>25</sup>Impo ikantiri Josoe:

—¿Antari gara pikañotagantaigana maganiro? Maikari maika virotyo inkisashitakempa Tasorintsi.

Impo maganirosooty yapatoventaiganakeri ipitankaigakerira impo itagaigakeri. <sup>26</sup>Impogini yovegotiaigakero mapu kara itagaigakerira. Maika kantakani ovegotiara kigonkero maika. Impo ovashi yapitsimareanaa Tasorintsi. ...

**8** <sup>1</sup>Impo ikantiri Josoe: “Maika gara pitsarogi. Gaiganakeri maganiro manataigacharira pintentaiganakerira piatashiigakerira Aikunirira. Maikari maika ario pinkante pagaveaigakeri igoveenkariegite intiegiri maganiro iriroegi pagutaigakerira yashintageigarira ontiri igipatsiegite, narotari kantankitsi.”

*Impogini iaigake ipogereagakerira maganiro. Impo atanatsi yomanataigara pashini kigonkero yagaveaigakerira timaigatsirira kara Kanaanku. Yogari Josoe itsatagakero ikantakeririra Tasorintsi Moiseshi yagutaigakerira kananeoegi igipatsiegite ipageigakerira iseraereegi irashintaigakemparora. Yogari iyashiki-*

*ganakerira Jora irashirikoni yogageigakeri. Ario ikañotagaigakeri iyashikiiganakerira Eperain irashirikoni yogageigakeri kigonkero itsotenkaigakerira maganiro iyashikiiganakerira Iseraere, kantankicha yogari iyashikiiganakerira Iroven intiri Gare intiri aikiro Manaseshi tera impaigeri, yagaigaketari iriroegi anta intati Jororanku. Ovashi okaratake tenige iromanataigaempa onti yapishigopireaigaka. Kantankicha aĩñokya pashini tekyarira impogereageri, iriroegitari pirishiteoegi intiegiri aikiro pashini kananeoegi timageigankitsirira kara.*

**22** <sup>1</sup>Impogini yogari Josoe ikaemai-gakeri iyashikiiganakerira Iroven intiri Gare intiri aikiro iyashikiiganakerira Manaseshi kogaigankitsirira intimaigakera intati Jororanku <sup>2</sup>ikantagiri: “Viroegi pitsatagaigakero ikantaiganakempirira Moiseshi iromperane Tasorintsi. Ario pikañotagaigakero aikiro magatiro nokantaigakempirira naro pitsatagasanoigakero, <sup>3</sup>pitentaigakaritari yokaegi pitovaireegi pomanataigakara pishiriagakogeigamatakatyoko. <sup>4</sup>Maikari maika kametitake piaigaera pivankoegiku anta intati Jororanku pintimantaigakemparora ipaiganakempirira Moiseshi, itsatagakerotari Tasorintsi ikantakerira pairani ipaigakerira pitovaireegi kipatsi ikashigakagaigakaririra irapishigopireantaigakemparora.”

**Ikantaiganairira Josoe iseraereegi**

**24** <sup>1</sup>Impogini yogari Josoe yapatoitaigakeri iseraereegi anta Sukemeku. Ikaemakagantaigakeri aikiro maganiro itinkamipage intiegiri aikiro ijoeseegite impo ipokaigake yaratinkimoigakeri Tasorintsi. <sup>2</sup>Impo inianake Josoe ikantaigiri maganiro:

—Ikantake Tasorintsi shintaigimpirira: ‘Pairani yogaegiri yashikiiganakempirira

onti itimaigaveta intati Eoperateshi, ariotari itimiri Tare tomintanakaririra Averan intiri Nakori. Inti yaventaigaveta ipegagetaganirira tasorintsi kogapage.

<sup>3</sup>Impo naro nokantakeri Averan iripokakera aka Kanaanku ovashi ipokakera, narotari tentakari. Impo nogitovaigaigakeri iyashikiiganakerira nopakeritari itomi paitacharira Isaako, <sup>4</sup>impo irirokya Isaako itomintakari Jakovo intiri Esao. Impo yogari Esao onti nopakeri kipatsi onakera otishi paitacharira Seire irashin-takemparora, kantankicha yogari Jakovo intiri itomiegi onti iaigake Ejipitoku.

<sup>5</sup>“Kantankicha impogini notigankakeri Moiseshi intiri Aaron Ejipitoku iriniaigakerira paraon impo nokisashiigakeri Ejipitokunirira natsipereakagaigakerira ovashi nagaigaatiri yashikiiganakempirira. <sup>6</sup>Kantankicha antari yogonkeigakara Kiraamonkiariku Inkaare ipatimaigavairi Ejipitokunirira ikenantaigaka ishigakotantaigarira intiri igavayoegite. <sup>7</sup>Impo yogaegiri yashikiiganakempirira ikaemavaitaiganake ikantaigakenara nompugamentaigakerira ovashi notikakotantaigakeri menkori ganiri yagaigavairi. Aikiro noviriakaigakeri inkaare ovashi imonteaignakara, kantankicha antari imaigavetanakara Ejipitokunirira iriroegi onti apamankakoiganakeri iokajaigakara maganiriro. Ineaigakerotari yashikiiganakempirira magatiro novetsikagetakerira anta Ejipitoku impo itimuntevageigake anta osarigagitetaapakera.

<sup>8</sup>“Impo notentaigakeri igipatsiegiteku amoreoegi timaigavetankicharira intati Jororan. Iriroegi yomanataigavakari, kantankicha naro nagaveakagaigakeri yagaveaigakerira yagutaigakerira igipatsiegite ipogereaigakerira. <sup>9</sup>Impogini irirokya manataigavakari igoveenkariegite moavitaegi paitacharira Varaka itomi Supore. Irirori ikaemakagantakeri Varaame itomi Veori inkisashiigakeri-

mera, <sup>10</sup>kantankicha naro teratyto nonkoge inkisashiigakemparira ontityo nokantakeri inkantakera nonkavintsajai-gakerira, ovashi tyampatyto inkante.

<sup>11</sup>Impogini viroegi pimonteagakaro Jororan pipokaigakera Jerikoku. Yomanataigavakempi Jerikokunirira intiegiri timaigankitsirira kara, iriroegitari amoreoegi, pereseoegi, kananeoegi, ititaegi, jerejeseoegi, jeveoegi intiegiri jevoseoegi, kantankicha naro nagaveakagaigakempi pagaveaigakerira. <sup>12</sup>Impogini noivaiganakempi nomintsarogaigakerira piteniro igoveenkariegite amoreoegi nogishigaigakerira tekyara pogonkeigempa viroegi, nerotyto viro tera tsikyata pogishigaigari. <sup>13</sup>Impo nopaigakempi kipatsi terira viroegi tsipereaventaigerone ontiri apatogetara pankotsi terira viroegi vetsikaigerone pitimantaigakarora. Aikiro nopaigakempi opankishiataganira ova ontiri orivo terira viroegi pankiigerone, iroro pogaigaka.’

<sup>14</sup>“Maikari maika pimpinkatsatasanoigakerira Tasorintsi pimpanirotanakerira pinkematsatasanoigakerira. Garatyto pisuretumaigaari ipegagetaganirira tasorintsi kogapage yaventaigavetakarira yashikiiganakempirira pairani itimaigavetakara intati Eoperateshi ontiri aikiro Ejipitoku. Panirosanotyto pinkematsaigakerira Tasorintsi. <sup>15</sup>Antari terika pinkogaige pinkematsaigakerira Tasorintsi virompaegityto, tsikyatyto pinkogai-gake tyani pimpegaigake pitasorintsiegite, irirorika ipegageigakerira itasorintsiegite yashikiiganakempirira pairani itimaigavetara intati Eoperateshi intirika itasorintsiegite amoreoegi timaigavetankicharira aka pitimaigakera viroegi maika. Kantankicha narori intiegiri noitaneegi panirotyto nonkematsaigakerira Tasorintsi.”

<sup>16</sup>Impo ikantaigi maganiriro:

—Garatyto napakuimaigiri Tasorintsi nogagashiiganakemparira ipegagetagani-

rira tasorintsi kogapage. <sup>17</sup>Irirotari Tasorintsi gaigaatiri pairani yashikiiganakenarira inagavetakara Ejipitoku ikisavintsagavetunkanira, aikiro irirotari vetsikagetakero posantepage terira oneimagentenkani, aikiro yagamaakoigakena avotsiku nokenaigapaakera tera tatoita gaigavakenane, aikiro tera impogereagavakena timageigankitsirira anta. <sup>18</sup>Impogini iivaiganakena yoneagaigavakarira amoreoegi intiegiri maganiro timageigankitsirira aka. Arioty nonkañoigake naroege aikiro irirototy nonkematsaigake Tasorintsi, irirotari shintaigana.

<sup>19</sup>Ikantaigiri Josoe:

—Garatyo pagaveaigi pinkematsatasanoigakerira Tasorintsi, teranika inkañoivagetumatempa aikiro itsaneigaigakempi tera inkoge pishineventaigakempara pashini. Garatyo yogavisaakotumaigimipi ineaigakempirika pimpugatsaigakemparira, aikiro povetsikaigakera terira onkametite. <sup>20</sup>Maikari maika ikavintsaaavageigakempitoty kara, kantankicha antari ganigerika pikematsaigairi irirori inti pishineventaigakempa ipegagetaganirira tasorintsi kogapage ario pinkante inkisaiganakempitoty impogereagakempira.

<sup>21</sup>Iriroegi ikantaigi:

—Garatyo ario nokañoigiro maika. Irirototy nonkematsatasanoigake Tasorintsi.

<sup>22</sup>Ikanti irirori:

—Iroventi arioty pinkañoigakero, tsikyatatari pineaigaka pikantaigakera irirototy pinkematsaigake Tasorintsi.

Ikantaigi iriroegi:

—Jeeje, arioni nonkañoigakero.

<sup>23</sup>Irirori ikanti:

—Iroventi maika atsi okageigerinitoty ipegagetaganirira tasorintsi kogapage nagetankitsirira viroegiku pimpaniioigakerira Tasorintsi pinkematsatasanoigakerira.

<sup>24</sup>Ikantaigi iriroegi:

—Nonkañoigakeniiroro, panirototy nonkematsatasanoigakerira irirori.

<sup>26</sup>Impo yogari Josoe itsirinkagetakero magatiro oka sankevantiku itsirinkantakarorira Moiseshi ikantagetakerira Tasorintsi. Impo yagake omarane mapu yovirinitakero otapinaku entsina nankitsirira onampinaku ivanko Tasorintsi ikanti:

<sup>27</sup>—Atsi gekava. Antari nokamantaigakempira magatiro ikantaigakairira Tasorintsi, oka mapu onoriaka aka aroegiku. Maikari maika novirinitakero aka kameti impogini pimpokapiniigakera ivankoku Tasorintsi pineaigaeroniri impo iroro suretagaigaempirone magatiro pikantaigakerira maika ganiri pikantatigairo.

<sup>28</sup>Impo yagatanakera iniaigakerira itigankaigairi iriaigaera itimaigira.

### **Ikamakera Josoe**

<sup>29</sup>Impogini ikamake Josoe itomi Non iromperane Tasorintsi. Onti ishiriagakotaka 110 shiriagarini. <sup>30</sup>Onti ikitataagani anta kipatsiku katinkatakeririra irirori anta Kanaanku yashintakarora. ...

<sup>31</sup>Antari aiñokyara itimi irirori intiegiri maganiro neaigakerorira magatiro terira oneimagentenkani yovetsikagetakerira Tasorintsi osarigagitetapaakera ontiri aikiro Kanaanku yogari iseraereegi ikematsaigakeri Tasorintsi.

### **Okitataaganira itonki Jose Sukemeku**

<sup>32</sup>Impogini okitataagani itonki Jose yamaigairira iyashikiiganakerira iponiaigaara Ejipitoku. Onti okitataagani anta kipatsiku inevitakeririra Jakovo itomiegi Amore iriri Sukeme, ontu opunataka 100 korikimenta. Intiegi okatinkaigake irashintaigakemparora iyashikiiganakerira Jose.

<sup>33</sup>Impogini ikamake aikiro Ereasare itomi Aaron, ontu ikitataagani otishiku nankitsirira igipatsiteku itomi paitacharira Pineese, irirotari okatinkatake irashintakemparora kipatsi nankitsirira otishipageku Eperainku.